

## Transkription von Testament HST 1382a

Ort, Datierung: Stralsund, 1382-01-30

Signatur: Stadtarchiv Hansestadt Stralsund, Test 1, Nr. 0396 [\[online\]](#)

Inhalt: Hinryk Rynsberch: Testament

---

Jn godes namen amen . Jk hinryk rynsberch en borgher thu deme sunde met wolmacht mynes sunden liues got / sy gheb(e)ndyt . Sette yk vnde make my(n) testame(n)t eft syk my(n) leuent wandelt in dat eweghe leue(n)t in alsusdanerwys thu / holdende Thu dem ersten male so be vele yk myne zele dem almechteghen gode . Vortmer so hebbe yk af ghesundert vn(de) af ghelecht myne ersten kynde(re) van mynen ersten wyue alse hinrik vnde johanse met rade vnde met volbort erer vru(n)d / van vader erue vnde van moder erue vnde hebbe em ghe gheuen dat hûs inder pu(m)per straten . dat hebbe yk em laten / sc(re)uen in des stades bûk . Vortmer hebbe yk em ghegheuen anderhalf hundert mark sundes(scher) . de ligghen vppe haghe=/mesters erue . dat steýt ok ghescreuen in des stades bûk . dar mede sint ze ghenslyken nogaftych gheworden . Vortmer de / lesten kynde(re) van der lesten vrouwen . alze Gherke vnde Taleke . de sitten met my vnde yk met em vppe wyn vn(de) vp vorlÿs / Des gheue yk thu voren vte taleken myner dochter wes yk hebbe van bedden van dekenen van lakenen van kussen van tafel / laken . gropen kannen ketele . vnd(e) gheue er dar thu allent des dar ÿs van ghesmyde . Vortm(er) so is my schuldich clawes bullen/spek hundert m(a)rk sundes(scher) . Dar heft he my vor ghesettet in des stades bûk dat halue erue dar he y(n)ne wonet in der ossenreÿ(ten) st(ra)ten / Vortm(er) is my schuldich her laurenti(us) van spadow en rÿdder . vyf vn(de) veftÿch mark sundes(scher) . dar steýt vor thu pande en suluen / gordel vppe wynachten de na negest tokome(n)de ys thu betalende . Dar hebben mede thu ghelouet hans plote clawes vore=/man vnde hinrÿk heyne met ener zame(n)den hant . vnde merten langhore heft dat gordel in syner kysten . vnde heft dat louede / mede met my vntfanghen . Vortm(er) is my schuldich jacop bytekow . vyf vnde veftÿch m(a)rk sundes(scher) vppe syn erue . dat steýt ghescre/uen in des stades bûk Vortm(er) wes yk mer hebbe dat sy luttyk efte vele dat sy weghelik edder vnweghelic dat gheue yk alto/male mynen kynd(er)en van der lesten vrouwen gherken vnde taleken lyke vnder em thu deylende . Desses testame(n)tes bin ik / nogaftych also langhe wente ik dat mu(n)tleken wedderspreke . Hir kÿze ik thu tho vormu(n)de(re)n erbar lude alse johan wobyn / Johan zulis . Johan buxstehuden . vnde thydeman douel . vnde bidde ze dat sy myne kynde(re) vorbenõmet also vore wesen vnde / also vorstan so yk em alle(n)s ghudes thu truwe vnde ghe loue . Ghe gheue(n) thu deme sunde na godes bort . m . ccc . Jndeme lxxxxij / ÿare . des Danredaghes vor lichtmissen